

La cuntraproposta ha chattà dapli sustegn

Cussegl grond refusa iniziativa davart energia cun charvun

■ (anr/fa) Cun 99:16 vuschs ha refusà il parlament grischun l'iniziativa «cunter electricitad producida cun charvun». Cun 98:14 vuschs ha el acceptà la cuntraproposta che admetta ovas cun charvun mo sche las emissiuns vegnan reducidas fermamain.

La Repower è l'unica societad d'energia en Svizra che ha la sedia principala e la gronda part da sias activitads en in chantun da muntogna. Il chantun Grischun è cun 46 pertschient da las aczias il pli grond acziunari da la societad. Ils ultims sis onns ha investì la Repower en media 50 milliuns francs l'onn per projects en Grischun e pajà mintg'onn 30 milliuns francs impostas e dividendas al chantun. Opposiziun cunter ils affars da la Repower hai dà en Grischun cur ch'igl è daventà enconuscent ch'ella investeschia tant a Brunsbüttel en Germania sco er en Italia, en Calabria, il project Saline Joniche, en ovas d'energia cun charvun: Cun 4366 vuschs han inoltrà 14 organizzaziuns per la protecziun da l'ambient sco era las partidas ps, verda e verd-liberals d'atun 2011 a Cuira l'iniziativa dal pievel «Gea ad electricitad netta senza forza electrica da charvun».

Cumissiu predeliberanta en accordanza cun la regenza

La cumissiu predeliberanta dal cussegl grond sut il presidi da *Jon Domenic Parolini* (pbd, Suot Tasna) ed en preschientscha da cusseglier guvernativ *Mario Cavigelli* ha discutà l'iniziativa. La maioritad dals commembers è vegnida a la conclusiun, en accordanza cun la regenza, da recumandar al suveran da refusar l'iniziativa. Empè da quella duess vegnir suttemessa a la votaziun ina cuntraproposta. «Quella tegna quint dals giavischs dals iniziants da reducir essenzialmain l'emissiun da CO₂ tar la produenziun d'energia en ovas electricas a charvun», ha ditg il president da la cumissiu: La cuntraproposta prevesa da fixar che la Repower u mintg'otra societad, a la quala il chantun è participà, na possian far en futur «naginas investiziuns en novs projects e novas ovas, sch'ella na reducescha betg l'emissiun da CO₂ essenzialmain envers il stadi tecnologic actual».



Il parlament grischun ha refusà l'iniziativa «cunter electricitad producida cun charvun» ed ha acceptà la cuntraproposta che admetta ovas cun charvun mo sche las emissiuns vegnan reducidas fermamain.

KEYSTONE

«Mantegnair la credibilitad da la Repower»

Da tschella vart permetta sco che Parolini ha menziunà la cuntraproposta ch'il chantun possia mantegnair sia participaziun a la Repower ch'è activa sin plaun internaziunal. «Sche l'iniziativa vegniss acceptada diminuiss quai la credibilitad da la Repower sco partenari fidà a l'ester», ha ditg il president da la cumissiu. Il pli grond privel è dentant sco che numerus commembers da la cumissiu han declerà «ch'il chantun pudess vegnir sfurzà, causa il contract che lia ils dus acziunaris, l'Axpo ed il chantun Grischun, tranter pèr.» Uschia existia il privel ch'il chantun stuess vender la participaziun a la Repower ch'el tegna actualmain sco er quella ch'el ha acquistà da nov. Tuts che han prendì il pled han punctuà che quai fiss ina gronda perdita per il chantun Grischun.

Diminui la participaziun al project Saline Joniche

Entant che la Repower s'ha retratga dal project a Brunsbüttel è il project Saline Joniche en Calabria anc adina actual, era sche la Repower ha diminui sia participa-

ziun da 57,5 sin 20 pertschient. «L'ovra vegn fabritgada, cun u senza participaziun da la Repower», ha ditg Jon Domenic Parolini, «cur ch'il project po vegnir realisà dependa uss da la politica d'energia taliana.» I sa tractia d'ina ovra fitg moderna cun mo paucas emissiuns che na mettescian betg en privel la sanadad dals abitants en Calabria, ha ditg *Alessandro Della Vedova* (pcd, Poschiavo), il qual ha cusseglià d'acceptar la cuntraproposta, «per il chantun e surtut era per la vischanca da Poschiavo èsi impurtant che la Repower restia ferma». *Johannes Pfenninger* (ps, Tumulstga) ha ditg che la cuntraproposta, la quala permettia ovas a charvun mo pli sch'ellas reduceschian fermamain las emissiuns, saja baingea positiv: «Anc pli positiv fissi stà sche Repower avess decis da vender cumpletmain sia participaziun a Saline Joniche», ha'l manegià. *Jon Pult* (ps, Cuira) ha critigà ch'il privel che las aczias chantunalas da la Repower pudessan vegnir vendidas na saja betg menziunà en la missiva da la regenza. Cun 98:14 vuschs ed ina abstenziun ha decis il cussegl grond d'acceptar la cuntraproposta e cun 99:16 vuschs da proponer al suveran da refusar l'iniziativa.